



Ilis victurs dal premi schurnalistic SRG.R 2013: Livio Foffa e David Spinnler cun Michael Spescha, il president dal cussegl dal public SRG.R (amez).

MAD

# Premi schurnalistic SRG.R 2013 per Livio Foffa e David Spinnler

■ (rtr) Il Cussegl dal public (CP SRG.R) ha surdà ier il premi schurnalistic SRG.R 2013 a Livio Foffa e David Spinnler. Els èn vegnids onurads per il project «Allegra Rumantschs» che radio SRF3 ha realisà il zercladur 2013 en collavuraziun cun Radio Rumantsch. Il Premi schurnalistic SRG.R 2013 onurescha products schurnalistics da la chasa RTR. La giuria che consista da tschintg commembers dal CP SRG.R ha tadlà e guardà tut las propostas. Inoltradas èn vegnidas bun 30 contribuziuns. La giuria ha fatg ina tscherna e nominà las suandantas tschintg propostas per il premi che vegn surdà en questa furma per l'emprima giada:

- «555 onns Val Schons – ed ussa?» Casper Nicca (Online)
- Livio Foffa/David Spinnler (Radio)
- «Marella: Da primblas e fifis en il DRG» Anna Serarda Campell (Radio)

– «La stgargiada da Breil» Otmar Seiler (Televisiun)

– «Si cheu sun jeu libers – Clau Scherrer» Gieri Venzin (Televisiun)

Da questas propostas han ils commembers dal CP SRG.R lura tschernì il victur «Allegra Rumantschs» cun Livio Foffa e David Spinnler. Il premi è dotà cun 6000 francs.

## «Allegra Rumantschs»

Il zercladur 2013 han radio SRF3 e Radio Rumantsch tschentà la Svizra Rumantscha, la cultura ed il linguatg rumantsch en il center da lur emissiuns. Livio Foffa ha moderà – ensemen cun Mario Torriani da SRF3 – l'emissiu da la damaun, e David Spinnler ha accompagna la collega Anic Lautenschlager sin in viadi che ha manà da Vrin sur Donat, Riom, Segl fin a Sent. En sia laudatio ha Michael Spescha, il president da la giu-

ria, menziunà en spezial la moda e maniera persuadenta, simpatica e cumpetenta cun la quala ils dus premiads han manà tras ils programs e realisà contribuziuns. Ultra da quai ha er il fatg che la collavuraziun cun SRF3 ha pussibilità a la Svizra Rumantscha da sa preschentar ad in public fitg vast chattà l'accoglientscha da la giuria.

## «Qualità na datti betg gratuit»

En ses referat d'introduziun sut il titel «Tge è bun schurnalissem e tge cundiziuns da basa dovri per che quel possa sa sviluppar?» ha Diego Yanez, anteriur schefredactor da la televisiun SRF e nov director da la scola da schurnalissem MAZ, fatg allusiu al fatg che nus ans chattain en in temp nua ch'ils meds da massa stattan avant grondas midadas. Tant pli dovrà il schurnalissem da qualità ina buna scolaziun e furmaziun.